
СЎХ ТУМАНИДА ЯНГИ СОҒЛОМЛАШТИРИШ МАРКАЗИ ФОЙДАЛАНИШГА ТОПШИРИЛДИ

Республикамиз ҳукумати ва бевосита давлатимиз раҳбарининг тиббиёт соҳасини ривожлантиришга қаратилган эътибори боис, Сўх туманида ҳам бу соҳада кенг кўламли ишлар амалга оширилмоқда. Туманнинг Офтобру маҳалла фуқаролар йиғинида янги соғломлаштириш маркази фойдаланишга топширилди.

Ўзбекистон Республикаси Президентининг 2020 йил 8 августдаги Сўх туманини комплекс ижтимоий-иқтисодий ривожлантиришга оид қабул қилган 4798-сонли қарорига асосан туманда бўш турган бинолардан самарали фойдаланиш, янги иш ўринларни яратиш мақсадида кенг қамровли ишлар амалга оширилаётир.

Жумладан, Сўх тумани собиқ ижтимоий-иқтисодий ва педагогика касб-ҳунар коллежининг фойдаланмаётган ётоқхона биноси бир ярим миллиард сўм инвестиция ҳисобига аҳолига тиббий хизмат кўрсатиш лойиҳаси амалга оширилди. Бугунги кунда “Сабрина невромед” хусусий корхонаси томонидан янги шаҳарсозлик нормаларига асосан замонавий тиббий хизмат кўрсатиш лойиҳаси ишга туширилиб, 20 та янги иш ўринлари яратишга эришилди. Қўшимча сифатида корхонанинг ён қисмида жойлашган “Сўх - Реацентр” хусусий корхонаси раҳбари Солижон Мўсаев ташаббуси билан янги соғломлаштириш маркази фойдаланишга топширилди.

- Дарҳақиқат, Сўх туманида фаолият олиб бораётган тадбиркорларга Президентимиз томонидан катта эътибор қаратилиб, иттиёзлар берилмоқда. Туман ҳокимлиги томонидан берилган бўш бино ва “Агробанк”дан олинган 220 миллион сўм кредит эвазига янги замонавий соғломлаштириш маркази бунёд этилди. Янги соғломлаштириш марказида гидротерапия, яъни сув билан даволаш, неврология-терапия, травматология бўлимлари мавжуд бўлиб, бу ерда нафақат Сўх тумани аҳолиси, балки қўшни Қирғизистон фуқаролари ҳам бемалол даволанишади. Асосий мақсадимиз ҳукуратимиз эътиборидан самарали фойдаланиб, аҳолига сифатли тиббий хизмат кўрсатишдан иборат, - дейди соғломлаштириш маркази раҳбари Солижон Мўсаев.

Соғломлаштириш маркази тақдимот маросимида иштирок этган туман ҳокими Сайидбахром Сайидмусаев Президентимиз томонидан тиббиёт соҳасини ривожлантиришга доир берилаётган эътибор ҳақида гапириб, янги очилган марказ энг аввало, фуқароларимиз саломатлигини ҳимоялаш ва энг асосийси, икки қўшни давлат дўстлигини мустаҳкамлашга хизмат қилишини алоҳида таъкидлаб ўтди.

Яна бир муҳим жиҳат: соғломлаштириш марказида кам таъминланган, ижтимоий кўмакка муҳтож оилалар, ногиронларнинг даволанишлари учун имтиёзлар мавжуд. Жумладан, тақдимот маросимида икки нафар фуқаро – болалиқдан ногирон бўлган Шоҳжаҳон Тожибоев ва Достон Ҳомидзодларга марказ маъмурияти томонидан бепул даволаниш учун сертификат топширилди.

Сўх тумани ҳокимлиги Ахборот хизмати

2020-10-08 17:14:05